

Pendatang Israel pindah, kebakaran merebak ke Tebing Barat
Free Malaysia Today
Nov 27, 2016

Pihak berkuasa Zionis berkata lebih 12 orang ditangkap kerana disyaki memulakan kebakaran besar yang berlaku sejak Khamis lalu.

JERUSALEM: Kebakaran di kawasan penempatan haram Yahudi di Tebing Barat yang dijajah rejim Zionis menyebabkan ratusan pendatang meninggalkan kediaman masing-masing selepas pemindahan besar-besaran di kawasan lain di Israel.

Pihak berkuasa Zionis berkata lebih 12 orang ditangkap kerana disyaki memulakan kebakaran besar yang berlaku sejak Khamis lalu.

Bomba Israel dan Palestin dengan dibantu pesawat asing berusaha memadamkan puluhan kebakaran liar yang diburukkan dengan musim kering dan angin kencang.

Dalam kebakaran terbaru, 1,000 penduduk penempatan Yahudi di Halamaish berhampiran Ramallah terpaksa berpindah selepas 45 rumah rosak atau musnah akibat terbakar, kata jurucakap polis rejim berkenaan.

Kebakaran juga berlaku berhampiran penempatan Yahudi di Dolev, Alfei Menashe dan Karnei Shomron, semuanya di Tebing Barat.

Pesawat pemadam kebakaran dari Israel dan beberapa negara termasuk Rusia, Turki, Greece, Perancis, Sepanyol dan Kanda terus menjatuhkan bertan-tan air di kawasan itu termasuk di perkampungan Nafatf, hampir dengan Jerusalem.

Jurucakap polis berkata usaha besar-besaran dapat mengawal kebakaran di Nataf pada petang semalam, membolehkan penduduk kembali ke rumah.

Sebuah pesawat Supertanker dari Amerika Syarikat baru tiba, dianggap sebagai pesawat pemadam kebakaran terbesar di dunia, turut serta operasi kecemasan itu.

Polis berkata mereka menahan 14 orang disyaki cuai dan memulakan kebakaran tetapi tidak memberikan identiti mereka.

Di Haifa, bandar ketiga terbesar Israel, puluhan ribu penduduk yang dipindahkan Khamis lalu, mula kembali ke rumah masing-masing untuk menilai kerosakan.

Pemimpin Zionis berkata, mereka mengesyaki kebakaran itu sengaja dilakukan penduduk Arab Israel atau Palestin.

Bagaimanapun, pemimpin masyarakat Arab Israel menyangkal dakwaan itu dengan berkata, penduduk keturunan Arab yang mewakili 17.5% populasi Israel juga terjejas akibat kebakaran berkenaan.

Pihak berkuasa Palestin turut menyertai usaha memadamkan kebakaran dengan menghantar 41 anggota bomba dan 8 trak ke Haifa, tempat kira-kira 200 keluarga hilang tempat tinggal.

Copyright (C) 2009-2016 MToday News Sdn. Bhd. All Rights Reserved.

Source:

<http://www.freemalaysiatoday.com/category/bahasa/2016/11/27/pendatang-israel-pindah-kebakaran-merebak-ke-tebing-barat/>